

滇雲歷年傳

滇雲歷年傳卷六

雲南叢書史部之一

契臯老人倪蛻輯

曾孫慎樞梅岑恭校

起明太祖洪武元年盡正統五年

明時田汝成著炎徼紀聞其叙猛密孟養事俱與它書異雖見聞不同而似無有諱飾其附論曰堪輿乍分函夏之地黎首蠢蠢與鳥獸無異五帝三王賢聖遞作獎掖以仁義陶鎔以禮樂而匡弼以刑罰然後人知衣冠之華飲食之美而彝倫之重其在四裔魑魅之與游豺狼之與居仁義禮樂之教刑罰之政曾未目覩猶如函夏之初何怪其俗之醜惡也夫四隅

之地西北爲首東北次之東南又次之西南其最後者周初封箕子於朝鮮卽爲嘉域而淮徐之區擯爲外地太伯端委以治吳猶不草祝髮文身之習秦開百粵而武帝以閩夷叛亂徙其民於江淮間空其地其時固藁莽狐兔之區也乃今聲華文物與中州等矣武帝遣唐蒙通夜郎元始拓土然直羈縻之而已我朝列於郡縣而西洋海國亦皆賓貢蓋氣化漸開則人文漸被若旋風漸拂首西北而終西南焉知滇楚之地不與中州等華文物如閩廣之交者乎又焉知八百里里瀕海諸夷不與列郡縣等乎一日乎

宣、宣、木、三、事

之卷首

明太祖高皇帝洪武元年故元梁王承制授左丞段寶
爵武定公

野史段寶通好梁王至善聞時有舍與自元江人寇
段寶迎擊敗之又破石多羅於海口梁王深德之遂
承制拜爵武定公

二年中慶土主廟崩

志廟在府城內卽大靈廟神爲摩訶迦羅蒙氏城滇
時建其像乃蜀匠羅都趙太所造有天竺僧菩提巴
波以秘咒丹書納像中又以手中菩提珠解一校種

之庭前成樹焉神屢著靈異滇人奉爲土神村邑處處奉之

野史是神爲有土之主廟乃神所憑依之所頽毀輒有灾故人謹護之至正十二年耆民楊光修至是忽傾陷梁王重修立碑記其事云

二年故元順帝殂於應昌太子立遣使來索餉

史元太子立於漠北遣侍郎脫脫來滇索餉且約連兵恢復

四年大理總管段寶遣段貞奉表歸款

滇考段寶聞明祖登極遣其叔段貞自會川奉表於

朝曰臣聞有天下者爲天下之主有列土者爲列土之君卑臣雖隔萬里之遙丹心每向中原之主大理自五帝三王之後兩漢二晉之終大蒙國受封於前唐鄭趙楊繼守於五季自臣祖思平有國貢禮屢行於宋室身心每到於闕廷迨至胡元不尙仁義專事暴殘元帝已遁北方梁王猶禍善聞邇聞明主奉天承運御極金陵中原太平邊徼寧乂意者中國有聖人履堯舜之正統小漢唐之淺圖天時人事然也或命依漢書故例歲貢天朝或效前元職名俾守舊土庶寒谷同回幽局照日八方浴德六合同春垂憐邊

境救恤一方欲修進貢恐觸明威合待事體之定專
候聖旨之頒謹此專差段貞王伯鵬馳奏以聞朝廷
嘉獎以書報之

段寶卒子明嗣

滇攷時有妖巫女歌曰莫道君爲山海主山海笑諧
諧園中花謝千萬朵別有明主來寶聞而惡之未幾
病死

五年翰林待制王禕奉使至滇招諭梁王

六年十二月故元梁王把匝剌瓦爾密殺朝使王禕

傳禕字子充浙江義烏人太祖徵至行在歷官翰林

待制與宋濂同典機密掌制誥洪武五年春正月命
禕偕蘇成詔諭雲南禕既奉命不少辭卽日就道以
六月至雲南見梁王君臣諭之曰大明創業統一萬
方爾僻在西南未被聲教特遣使者來諭意亟宜奉
版圖歸職方不聽館別室禕又言曰朝廷軫念雲南
黎庶不忍殲於鋒刃故令開諭若拒不服必奉行天
討王曰漢閉昆明命使莫達唐勤遠畧祇以自憊天
兵雖多恐無所用之禕曰王未聞乎陳友諒據楚張
士誠據吳陳友定據閩明玉珍據蜀皆崇關峻嶺長
江天塹卒膏斧鑕雖爾元君北走以死擴廓帖木兒

賣降恐後往事俱在今王自度謀勇孰愈誠諒兵強
利廣孰愈中國量德較義孰愈天朝推亡固存孰愈
天命王曰先生言是也會元使自漠北來欲連兵以
拒必欲迫梁王殺禕王不忍匿禕民間使聞之誚讓
益甚王不得已出禕見使禕乃慷慨言曰天旣訖汝
元命我皇上實代之汝爍火餘燼乃與日月爭光乎
我豈畏死者耶元使厲聲詈梁王或曰兩國相爭不
罪來使況王公文行天下無雙宜有以全之元使曰
今雖孔聖不可存梁王不能救遂遇害時六年十二
月二十四日也卒年五十有二滇人聞之莫不流涕

梁王遣司徒達里麻致祭具棺衾斂之三十二年贈翰林學士奉議大夫謚文節正統間改忠文成化間賜祭立祠命有司春秋致祭

輓按通志載王忠文公墓在府東二里地藏寺左後今寺右立有小石碣但寺後皆沮洳窪下竝無堆阜不知玉骸金骼果藏於此否憶說郛中有一冊是公之子來求公骨不得僅於一村翁口指云在此處約畧正在今立石地而亦非有的實其辭甚悲蓋屬公子王紳之以淚和墨而書之者也又按王忠文祠墓記嘉靖十八年春朱副使良矩車叅政文炳爲築祠

品祠北封土爲墓加樹焉其碣曰皇明詔使王忠文先生墓并置守塚卒一人今亦不知處所蓋有二忠三忠之合祀而并此虛墓俱亡矣

七年詔遣故元威順王子伯伯諭梁王不從

八年九月詔遣湖廣行省叅政吳雲復諭梁王下殺之於道

傳雲字友雲江南宜興人以能詩授校書郎改渭南縣丞陞刑部郎中尋陞尙書改湖廣叅知政事先是上遣王禕詔諭雲南遇害特遣雲齎勅往諭時梁王遣其臣鐵知院二十人報使漠北爲徐達所獲送京

海雲先生集 卷一
師上釋之令與雲偕行抵雲南之沙塘口鐵知院等
脇雲元服辮髮改易制書詐爲元使共給梁王雲責
以大義矢死不回梁王又遣人逼之雲終不屈鐵知
院等乃道殺之迨後梁王具棺槨葬之於嵩明秀嵩
山下給孤寺後子徽補國子監生授交趾知縣宏治
間贈雲刑部尙書諡忠節與王禕同祀賜額曰二忠
有司春秋致祭

蛻按野史載王忠文被殺父老收藏於地藏寺後吳
忠節則云櫬回葬江夏與志傳不同但今工有微迹
可見而吳乃宿草不披冷烟俱滅且新舊志皆不載

吳墓似櫬回之說不謬但喪不歸於故里宜興而葬於官場江夏此則又屬可疑者耳

十四年段明死其叔段世權國事

野史時梁王稱宣光年號段氏亦復稱大理國改元自庚戌至壬戌凡十有三年

九月命潁川侯傅友德爲征南將軍永昌侯藍玉西平侯沐英爲副將軍帥諸路師征雲南

史上諭友德等曰雲南自昔爲西南夷至漢置吏臣屬中國今元遺孽把匝剌瓦爾密等自恃險遠輒害使臣在所必討爾等行師之際當知其山川形勢以

規進取師行上餞於龍江旌旗蔽江而上友德師至
湖廣分遣都督郭英胡海洋陳桓等帥兵五萬由四
川永寧趨烏撒友德等率大兵由辰沅趨貴州

冬十二月傅友德等師至普安攻下之遂進平曲靖獲
其平章達里麻

史梁王聞大師南征遣司徒平章達里麻將精兵十
餘萬屯曲靖以拒明師沐英謂友德曰彼謂我師疲
於深入未有虞心若倍道疾趨出其不意破之必矣
及德是之遂進師未至曲靖數里忽大霧四塞衝霧
而行聞六甲已臨白石江頃之霧霽達里麻望見大

驚倉皇失措友德卽欲濟師英曰我軍遠來形勢旣
露固利速戰然亟濟恐爲所扼乃整師臨流勢若欲
渡達里麻悉精銳扼水英則別遣數十人從下流潛
渡出其後鳴金鼓樹旗幟達里麻急撒衆禦之陣動
英乃拔劍督師濟江以猛而善泅者先之長刀蒙盾
破其前軍敵氣索退數里而陣明師畢濟友德麾兵
進薄之英縱鐵騎擣其中堅敵遂大敗生擒達里麻
橫屍十餘里軍聲大振友德分遣藍玉沐英帥師趨
雲南而自以數萬衆向烏撒爲郭英等聲援

征南副將軍藍玉沐英師次板橋故元梁王把匝刺瓦

爾密率其妃屬及其親信臣驢兒達德俱赴滇池死右丞觀音保以城降雲南平

史十二月丙寅兵次曲靖敗梁王兵於白石江擒其將達里麻癸酉師次板橋梁王謂左丞驢兒達德曰我宗室無降理我亦居守則生民殘害矣乃奉其母嘉禧同其妻忽的斤等百餘人鼓樂出西門驢兒達德率其妻子以從遂走呈貢之羅佐山亦名羅藏山又入晉寧之忽納砦卽鯨魚山也甲戌右丞觀音保以城降諸父老焚香出迎玉等整衆入城秋毫無犯收官府符信圖籍撫定其民梁王聞城不守乃進請